

四庫全書

史部

欽定四庫全書

水經注釋卷三十二

仁和趙一清撰

滲水 蘄水 泆水 泆水

泄水 肥水 施水 補 滌水

沮水 漳水 夏水 羗水

涪水 梓潼水 涪水

滲水出江夏平春縣西

溲水北出大義山南至厲鄉西賜水入焉水源東出  
大紫山分為二水一水西逕厲鄉南水南有童山即  
烈山也山下有一穴父老相傳云是神農所生處也  
故禮謂之烈山氏水北有九井子書所謂神農既誕  
九井自穿謂斯水也又言沒一井則衆水動井今堙  
塞遺迹髣髴存焉亦云賴鄉故賴國也有神農社賜  
水西南流入於溲即厲水也賜厲聲相近宜為厲水  
矣一水出義鄉西南入隋又注溲溲水又南逕隋縣

注安陸也

南過安陸入于涓

蘄水出江夏蘄春縣北山

山即蘄卞也水首受希水枝津西南流歷蘄水出蠻  
中故以此蠻為五水蠻五水卽謂蘄水希水巴水也  
又赤亭水西歸水蠻左馮居岨藉山川世為抄暴宋  
世沈慶之於西陽上下誅伐蠻夷卽五水蠻也

南過其縣西

晉改為蘄陽縣縣徙江州置大陽戍後齊安郡移治於此也

又南至蘄口南入于江

蘄水南對蘄陽州入于大江謂之蘄口州上有蘄陽縣徙

泆水出廬江雩婁縣大別山

俗名之為檀公峴蓋大別之異名也

一清按尚書正義曰地理志無

大別鄭玄曰在廬江安豐縣杜預春秋註云大別不知何處或云在安豐縣西南左傳云吳既與楚夾漢

然後楚乃濟漢而陣自小別至于大別然則二別近漢之名無緣得在安豐如預所言雖不知其處要與內方相接漢水所經必在荊州界也胡渭曰按地理志六安國安豐縣下云高貢大別山在西南鄭杜說所自出正義謂地志無大別何也又云大別山在漢陽府城東北半里漢水兩岸水經注江水逕魯山南古翼際山也元和志魯山一名大別山在漢陽府東北一百步其山前枕蜀江北帶漢山杜元凱已知在江夏不在安豐鄒氏主杜說而終不能指魯山為大別至唐人始能言之

### 北過其縣東

縣故吳地春秋左傳襄公二十六年楚子秦人侵吳及雩婁聞吳有備而還是也晉書地道記云在安豐

縣之西南即其界也故地理志曰決水出雩婁

又北過安豐縣東

決水自雩婁縣北逕雞備亭春秋昭公二十三年吳

敗諸侯之師于雞父者也安豐縣故城今邊城郡治

也王莽之美風也世祖建武八年封大將軍涼州牧

竇融為國晉立安豐郡

一清按漢志六安國安豐縣莽曰美豐今註云美風似因

安風縣名而論續志有安豐縣又云安豐侯國蓋先

武以安豐陽泉蓼安風四縣封竇融為安豐侯其國

都則治安風爰及魏晉之安豐郡皆治安風縣也魏

牧地形志云邊城郡治麻步山領史水一縣則南北

流移境土非一故治無常所也此與淮水注之安豐  
津水南有城故安豐都尉治之安豐蓋兩地而異名  
不可混也 決水自縣西北流逕蓼縣故縣東又逕其北漢

高帝六年封孔藁為侯國也世謂之決水也水又西

北灌水注之其水導源廬江金蘭縣西北東陵鄉大

蘇山即淮水也

一清按漢志廬江郡下云金蘭西北有東陵鄉淮水出屬揚州胡渭曰淮

當作灌愚謂非也班志原是淮字道元故以之釋灌水若破淮作灌則以灌水釋灌水於義豈可通乎

許慎曰出雩婁縣俗謂之澮水也

一清按說文澮是汾澮之澮而別有

澮水出廬江入淮以水惠 褚先生所謂神龜出於江  
聲音胡計切者即是水也



灌之間嘉林之中蓋謂此水也

全氏曰今龜英傳作江淮淮即灌也非出

桐栢之淮

灌水東北逕蓼縣故城西而北注決水也故地

理志曰決水北注蓼入淮灌水於蓼亦入決

一清按漢志廬

江郡雩婁縣下云決水北至蓼入淮又有灌水亦北至蓼入決道元蓋抄其詞而稍變之似失意義縣

西蓼邑即臯陶之封邑也春秋宣公八年冬楚公子

變滅舒蓼滅文仲聞之曰臯陶庭堅不祀忽諸德之

不建民之無援哀哉

朱氏謀埤箋曰按左傳文公五年冬楚公子變滅蓼滅文仲有

臯陶不祀之嘆至宣公八年夏楚人滅舒蓼自是兩事

決水又北右會陽泉水

水受泃水東北流逕陽泉縣故城東故陽泉鄉也漢

靈帝中封太尉黃琬為侯國

一清按靈帝下脫年號後漢書黃琬傳云董卓

秉政以琬名臣徵為司徒遷太尉更封陽泉鄉侯卓入朝在靈帝崩後則琬封當在獻帝初年亦非靈帝

也又西北流左入泃水謂之陽泉口也

一清按三國志魏書滿寵

傳吳將陸遜向廬江寵整軍趨陽宜口即陽泉口也

又吳書孫綝傳朱異帥三萬人屯安豐城為文欽勢

魏兖州刺史州泰拒異于陽淵鄆注施水篇亦作陽淵續志廬江郡陽泉侯國劉昭補注引廣志曰有陽

湖泉

又北入于淮

俗謂之決口非也斯決灌之口矣余往因公至于淮

津舟車所屆次于決水訪其民宰與古名全達脈水

尋經方知決口

一清按上文既以俗謂決口為非而此又云方知決口何耶或恐有脫誤

蓋灌漑聲相倫習俗害真耳

泚水出廬江蕩縣西南霍山東北

蕩者山水名也開山圖蕩山圍繞大山為霍山郭景

純曰滯水出焉縣即其稱矣春秋昭公二十七年吳

因楚圍滯是也地理志曰泚水出泚山不言霍山泚

字或作淠淠水又東北逕博安縣泄水出焉

東北過六縣東

淠水東北右會踰鼓川水水出東南踰鼓川西北流  
左注淠水淠水又西北逕馬亭城西又西北逕六安  
縣故城西縣故咎陶國也夏禹封其少子奉其祀今

縣都陂中有大冢民傳曰公琴者即臯陶冢也楚人

謂冢為琴矣

一清按此文與汝水篇注可參証皇覽亦謂之曰琴也

漢高帝元

年別為衡山國五年屬淮南文帝十六年復為衡山

國武帝元狩二年別為六安國王莽之安風也漢書所謂以舒屠六晉太康三年廬江郡治淠水又西北分為二水芍陂出焉又北逕五門亭西北流逕安豐縣故城西晉書地道記安豐郡之屬縣也俗名之曰安城矣又北會濡水亂流西北注之

北入于淮

水之決會謂之沘口也

泄水出博安縣

一清按漢志九江郡有博鄉縣續志無蓋後漢省說文云泄水受博安洵波豈

順帝以前曾改博鄉為博安乎顧祖禹曰即壽州之都陸城晉元帝封六安繆王子交為侯邑考晉志又無之

博安縣地理志之博鄉縣也王莽以為揚陸矣泄水

自縣上承沘水於麻步川西北出歷濡谿謂之濡水

也

全氏曰漢志六安國六縣如谿水首受沘東北至壽春入芍陂即濡谿水也

北過芍陂西與沘水合

泄水自濡谿口逕安豐縣北流注于淠一謂之濡須

口

西北入于淮

亂流同歸也

肥水出九江成德縣廣陽鄉西

呂忱字林曰肥水出良餘山俗謂之連枷山亦或以為獨山也北流分為二水施水出焉肥水又北逕蒺城東又北逕蒺丘東右會施水枝津首受施水於合肥縣城東西流逕成德縣注于肥水也

肥水別北過其縣西北入芍陂

肥水自蒺丘北逕成德縣故城西王莽更之曰平阿

也又北逕芍陂東又北逕死虎塘東芍陂瀆上承井  
門與芍陂更相通注故經言入芍陂矣肥水東北右  
合閭澗水水上承施水於合肥縣北流逕浚道縣西  
水積為陽湖陽湖水自塘西北逕死虎亭南夾橫塘  
西注宋太始初豫州司馬劉順帥衆八千據其城地

以拒劉劬杜叔寶以精兵五千送糧死虎劉劬破之

此塘一清按通鑑宋明帝紀殷琰將劉順柳倫皇甫道烈龐天生等八千人東據宛唐胡三省註云

宛唐水經注作死庫杜佑通典作死武地名在壽州  
壽春縣東四十餘里杜叔寶宋書殷琰傳作趙叔寶



水分為二洛澗出焉閭漿水注之水受芍陂陂水上  
承澗水於五門亭南別為斷神水又東北逕五門亭  
東亭為衆水之會也斷神水又東北逕神迹亭東又  
北謂之豪水雖廣名事實異一水又東北逕白芍亭  
東積而為湖謂之芍陂陂周一百二十餘里在壽春

縣南八十里

一清按元和郡縣志云芍陂周二百里逕百里

言楚相孫叔敖

所造魏太尉王淩

沈氏曰王淩時為征東非太尉

與吳將張休戰于

芍陂即此處也陂有五門吐納川流西北為香門陂

水北逕孫叔敖祠下謂之芍陂瀆

全氏曰按華夏對境圖曰芍陂周二

百二十四里與陽泉大業並子思作引潁水為子午渠開六門潁水即潁水也陽泉見泐水篇其大業當在琴縣蓋取臯陶之字又北分為二水一水東注黎為陂名而善長失之

漿黎漿水東逕黎漿亭南文欽之叛吳軍北入諸葛緒拒之于黎漿即此水也東注肥水謂之黎漿水口

又北過壽春縣東

肥水自黎漿北逕壽春縣故城東為長瀨津津側有謝堂北亭迎送所薄水陸舟車是焉萃止又西北左

合東谿谿水引瀆北出西南流逕導公寺西寺側因  
谿建刹五層屋宇開敞崇虛巖嶢也又西南流注于  
肥肥水又西逕東臺下臺即壽春外郭東北隅阿之  
榭也東側有一湖三春九夏紅荷覆水引瀆城隍水  
積成潭謂之東臺湖亦肥南播也肥水西逕壽春縣  
故城北右合北谿水導北山泉源下注漱石頽隍水  
上長林挿天高柯負日出于山林精舍右山淵寺左  
道俗嬉遊多萃其下内外引汲泉同七淨谿水浴注

西南逕陸道士解南精廬臨側川谿大不為廣小足  
開居亦勝境也谿水流注于肥水

北入于淮

肥水又西分為二水右即肥之故瀆過為船官湖以  
置舟艦也肥水左瀆又西逕石橋門北亦曰草市門  
外有石梁渡北州州上有西昌寺寺三面阻水佛堂  
設三像真容妙相相服精煒是蕭武帝所立也寺西  
即船官坊倉兕都水是營是作湖北對八公山山無

樹木惟童阜山上有淮南王劉安廟劉安是漢高  
帝之孫厲王長子也折節下士篤好儒學養方術之  
徒數十人皆為俊異焉多神仙秘法鴻寶之道忽有  
八公皆鬚眉皓素詣門希見門者曰吾王好長生今  
先生無住衰之術未敢相聞八公咸變成童王甚敬  
之八士並能鍊金化丹出入無間乃與安登山埋金  
於地白日昇天餘藥在器雞犬舐之者俱得上昇其  
所昇之處踐石皆陷人馬跡存焉故山即以八公為

目余登其上人馬之迹無聞矣惟廟像存焉廟中圓  
安及八士像皆在牀帳如平生被服纖麗咸羽扇裙  
帔巾壺枕物一如常居廟前有碑齊永明十年所建  
也山有隱室石井即崔瑛所謂余下壽春登北嶺淮  
南之道室八公石井在焉亦曰左吳與王春傳生等  
尋安同詣元州還為著記號曰八公記都不列其雞  
犬昇空之事矣按漢書安反伏誅葛洪明其得道事  
備抱朴子及神仙傳肥水又左納芍陂瀆瀆水自黎

漿分水引瀆壽春城北逕芍陂門右北入城昔鉅鹿  
時苗為縣長是其留犢處也瀆東有東都街街之左  
道北有宋司空劉劬廟宋元徽二年建于東鄉孝義  
里廟前有碑時年碑功方劄齊永明元年方立沈約  
宋書言太始元年豫州刺史殷琰叛明帝假劬輔國  
將軍討之琰降不犯秋毫百姓來蘇生為立碑文過  
其實建元四年故吏顏幼明為其廟銘故佐龐斑為  
廟讚夏侯敬友為廟頌並附刊于碑側瀆水又北逕

相國城東劉武帝伐長安所築也堂宇廳館仍故以  
相國為名又北出城注肥水又西逕金城北又西左  
合羊頭谿水水受芍陂西北歷羊頭谿謂之羊頭澗  
水北逕熨湖左會烽水瀆瀆受淮于烽村南下注羊  
頭谿側逕壽春城西又北歷象門白沙門北出金城  
西門道遙樓下北注肥瀆肥水北注舊瀆之橫塘為  
元康南路馳道左通船官坊也肥水逕元康城西北  
流北出水際有曲水堂亦嬉遊所集也又西北流逕



八公山昔在晉世謝玄北禦苻堅祈八公山及置陣  
于肥水之濱堅望山上草木咸為人狀此即故戰敗  
處非八公之靈有助蓋苻氏將亡之惑也肥水又西  
北注于淮是曰肥口也

施水亦從廣陽鄉東南入于湖

全氏曰施水導源廣陽鄉與肥同源者也逕合

肥入芍陂而歸巢湖經丈之例未有  
不溯其所自出者此篇獨變文書之

施水受肥於廣陽鄉東南流逕合肥縣應劭曰夏水  
出城父東南至此與肥合故曰合肥關駟亦言出沛

國城父東至此合為肥余案川殊脈別無沿注之理  
方知應闢二說非實証也蓋夏水暴長施合於肥故

曰合肥也非謂夏水

胡三省通鑑釋文辨誤曰史始曰合肥漢九江邑應劭曰夏水

出城父東南至此與肥合故曰合肥余按應劭所云  
鄴道元固疑之矣道元以夏水出城父而東南流入  
于淮則與淮合無絕淮而南流至合肥縣與肥水合  
之理而施水上承肥水于廣陽鄉東南逕合肥縣又  
東南流而入于溧湖肥水西北注淮而施水東南入  
溧湖已自分流惟夏月暴水漲溢則二水復能合于  
合肥縣界故合肥以此得名道元之說庶乎信而有  
徵矣一清按漢志沛郡城父縣下云夏肥水東南至  
下蔡入淮過郡二行六百里城父與下蔡皆屬沛郡  
不得云過郡二也而應劭于九江合肥縣下云夏肥

水出父城東南至此與淮合所謂父城即沛郡之城  
父非潁川之屬縣又云與淮合則亦何闕于合肥之  
名耶道元引之改而曰出城父與肥合且又証以闕  
駟之說肥在淮南夏肥水安能截淮南過而與之合  
且所謂與肥合者夏肥水也是肥與肥合矣道元知  
其說之繆妄故折之曰非謂夏水非謂夏水者非謂  
夏肥水也又曰夏水暴長施合于肥故曰合肥施水  
亦出九江成德之廣陽鄉而流合于肥故曰合肥夏  
月水暴長二水相合與導潁澤被孟諸之義相扶道  
元所謂水盛方乃覆被者也夏肥水源流已具淮水  
注中班志在城父下本自不錯應劭移之合肥之下  
則外矣唐盧潘合肥辨曰漢書淮南王殺開章葬之  
肥陵肥陵肥水之上也應劭云夏水出父城東南至  
此與肥合故曰合肥今按肥水出雞鳴山北流二十  
里所分而為二其一東南流經合肥縣南又東南入  
淝湖其一西北流二百里出壽春西投于淮二水皆

曰肥爾雅歸異出同流肥言所出同而歸異也是山也高不過百尋所出惟一水分流而已其源實同而所流實異也故昏曰肥今二州圖記皆不見夏水與父城惡睹其謂夏與肥合者乎合于一源分而為肥合亦同也故曰合肥而云夏與肥合者亦應氏之失也此文見姚鉉唐文粹中其言足發鄴氏之所未備

施水自城父

一清按成父當作成德此是行間斷爛後人填補見有成字遂疑即上文之城

父而遮奮筆書之真鄴氏之枉屈也

東逕合肥縣城南城居四水中東

又有逍遙津水上舊有梁孫權之攻合肥也張遼敗之於津北橋不撤者兩版權與甘寧蹴馬趨津谷利自後著鞭助勢遂得渡梁凌統被鎧落水後到追亡

流涕津渚施水又東分為二水枝水北出焉下注陽  
澗施水又東逕湖口戍東注巢湖謂之施口也

補  
滁水

唐六典淮南道大川曰滁肥之水巢湖在烏寰宇記  
廬州慎縣下云滁水源出縣西暴禿古塘道元注水  
經云滁水出浚道縣也又和州含山縣下引水經注  
云滁水東經大峴西北流逕大峴亭即此山也方輿  
紀要云滁河源出廬州府合肥縣東北七十里廢梁

縣界東流過滁州全椒縣南六十里又東至滁州東  
南三汊河又東至江寧府六合縣為瓦梁河東南流  
至瓜埠口而入大江三國志吳赤烏三年作堂邑涂  
塘以淹北道今滁州古曰涂中其地實南北扼要之  
區猶脫落無聞則濱江來會之水大要失亡矣

沮水出漢中房陵縣睢山

全氏曰按睢山楊慎本作淮山誤也漢志房陵縣淮山淮

水所出東山沮水所出是房陵固有淮山然非沮水所出也睢山即東山之一名字稍近淮因之或訛東

南過臨沮縣界

沮水出東汶陽郡沮陽縣西北景山即荆山首也高峰霞舉峻竦層雲山海經云金玉是出亦沮水之所導故淮南子曰沮出荆山高誘云荆山在左馮翊懷德縣蓋以洛水有漆沮之名故也斯謬証耳杜預云水出新城郡之西南發阿山蓋山異名也沮水東南流逕沮陽縣東南縣有潼水東逕其縣南下入沮沮水又東南逕汶陽郡此即高安縣界郡治錫城縣居郡下城故新城之下邑義熙初分新城立西表悉重山

也沮水南逕臨沮縣西青谿水注之水出縣西青山  
之東有檻泉即青谿之源也口徑數丈其深不測其  
泉甚靈潔至于炎陽有亢陰雨無時以穢物投之輒  
能暴雨其水導源東流以源出青山故以青谿為名  
尋源浮谿竒為深峭盛宏之云稠木傍生凌空交合  
危樓傾岳恒有落勢風泉傳響於青林之下巖猿流  
聲於白雲之上遊者常若目不周翫情不給賞是以  
林徒栖托雲客宅心泉側多結道士精廬焉青谿又



東流入于沮水沮水又屈逕其縣南晉咸和中為沮陽郡治也沮水又東南逕當陽縣故城北城因岡為阻北枕沮川其故城在東一百四十里謂之東城在綠林長坂南長坂即張翼德橫矛處也沮水又東南逕驢城西磨城東又南逕麥城西昔闕雲長詐降處自此遂叛傳云子胥造驢磨二城以攻麥邑即諺所云東驢西磨城自破者矣沮水又南逕楚昭王墓東對麥城故王仲宣之賦登樓云西接昭丘是也沮水

又南與漳水合焉

又東南過枝江縣東南入于江

沮水又東南逕長城東又東南流注于江謂之沮口也

漳水出臨沮縣東荆山東南過蓼亭又東過章鄉南

荆山在景山東一百餘里新城沅鄉縣界雖羣峰競舉而荆山獨秀漳水東南流又屈西南逕編縣南縣舊城在東北一百四十里高陽城西南移治許茂故

城南臨漳水又南歷臨沮縣之彰鄉南昔闕公保  
麥城詐降而遜潘璋斬之于此漳水又南逕當陽縣  
又南逕麥城東王仲宣登其東南隅臨漳水而賦之

曰夾清漳之通浦倚曲沮之長州是也漳水又南流

水注之山海經曰滄水出東北宜諸之山南流注于

漳水

全氏曰按漢志南郡高成縣滄山滄水所出東  
入潞潞水南至華容入江潞水即油水也不言

入漳善長蓋主山經而  
油水篇則又主漢志

又南至枝江縣北烏扶邑入于沮

地理志曰禹貢東條荆山

一清按東條字誤當作南條

在臨沮縣

之東北漳水所出東至江陵入陽水注于沔非也今漳水於當陽縣之東南一百里餘而右會沮水也

夏水出江津于江陵縣東南

全氏曰按經丈之例皆曰出某郡某縣某山獨汶水

獲水實即葭蕩渠之注陰溝者而夏水亦即江水也皆變文書之一清按水經注此條本之伏生大傳夏水出江入沔沔亦入江荆州之沔宜以夏水當之

江津豫章口東有中夏口是夏水之首江之沔也屈

原所謂過夏首而西浮顛龍門而不見也龍門即郢

城之東門也

又東過華容縣南

縣故容城矣春秋魯定公四年許遷于容城是也北臨中夏水自縣東北逕成都郡故城南晉永嘉中西蜀阻亂劉華容諸城為王頴都夏水又逕交趾太守胡寵墓北漢太傅廣身陪陵而此墓側有廣碑故世謂廣冢非也其文言是蔡伯喈之辭歷范西戎墓南王隱晉書地道記曰陶朱冢在華容縣樹碑云是越

之范蠡

沈氏曰王仲宣登樓賦已有北稱陶牧之  
文本注云陶鄉名牧郊外地則非指范蠡

晉  
太康地記盛宏之荊州記劉澄之記並言在縣之西  
南郭仲產言在縣東十里檢其碑題云故西戎令范  
君之墓碑文缺落不詳其人稱蠡是其先也碑是永  
嘉二年立觀其所述最為究悉似親經其地故違衆  
說從而止之夏水又東逕監利縣南晉武帝太康五  
年立縣土卑下澤多陂池西南自州陵東界逕于雲  
杜沘陽為雲夢之藪矣韋昭曰雲夢在華容縣按春

秋魯昭公三年鄭伯如楚子產備田具以田江南之

夢郭景純言華容縣東南巴丘湖是也

一清按漢志南郡華容縣

雲夢澤在南荆州數

杜預云枝江縣安陸縣有雲夢蓋跨川互

陘兼苞勢廣矣夏水又東夏陽水注之水上承陽水於竟陵縣之柘口東南流與中夏水合謂之夏陽水

又東北逕江夏惠懷縣北而東北注

一清按隋書地理志梁置沔陽

營陽州城三郡及州陵惠懷二縣西魏有二縣改置建陽縣其故城在沔陽州北二里道元卒于孝昌二  
年上距梁天監元年僅五年耳其成書又不知在何時而遽稱江表新朝之建置乎此蓋後人所增入與

沔水注引吳均  
之詩可互稱也

又東至江夏雲杜縣入于沔

應劭十三州記曰江別入沔為夏水源夫夏之為名  
始於分江冬竭夏流故納厥稱既有中夏之目亦苞

大夏之名矣當其決水之所出謂之膾口焉

一清按  
寰宇記

引荊州圖副曰夏水既非山流有若川渚冬斷夏通  
故名又云盛宏之云夏首又東二十餘里有渚口二  
水之間謂之夏洲首尾七百  
里華容監利二縣在其中矣鄭玄注尚書滄浪之水

言今謂之夏水來同故世變名焉劉澄之著永初山



川記云夏水古文以為滄浪漁父所歌也因此言之  
水應由沔今按夏水是江流沔非沔入夏假使沔注  
夏其勢西南非尚書又東之文余亦以為非也自賸  
口下沔水通兼夏日而會于江謂之夏沔也故春秋  
左傳稱吳伐楚沈尹射奔命夏沔也杜預曰漢水曲  
入江即夏口矣

一清按劉昭郡國志補註云史記蘇秦說楚威王東有夏州左傳楚莊伐

陳鄉取一人焉以歸謂之夏州今夏口城有州名夏口則是夏之為名始于楚莊水因以立稱道元以仲璩康成之說為非是蓋特具卓識也

羌水出羌中參狼谷

彼俗謂之天池白水矣地理志曰出隴西羌道東南  
流逕宕昌城東西北去天池五百餘里白水又東南  
逕宕婁川城東南北注羌水昔姜維之寇隴右也聞  
鍾會入漢中引還知雍州刺史諸葛緒屯橋頭從孔  
函谷將出北道緒邀之此路維更從北道渡橋頭入  
劍閣緒追之不及全氏曰按是時姜維由沓中赴難  
非有事于隴右也諸葛緒塞橋頭  
維乃由北道入示將斷其後緒遂退還維  
反軍渡橋頭入劍閣非緒邀之于北道也

東南陽部水注之水發東北陽部谿西南逕安民戍  
又西南注羌水又東南逕武階城西南又東南逕葭  
蘆城西羊湯水入焉水出西北陰平北界湯谿東南  
逕北部城北又東南逕五部城南東南右與婁水合  
傍西南出即水源所發也羌水又逕葭蘆城南逕餘  
城南一清按此處有脫誤又東南左會五部水水有二源出南  
北五部谿西南流合為一水屈而東南注羌水羌水  
又東南流至橋頭合白水東南去白水縣故城九十

里

又東南至廣魏白水縣與漢水合又東南過巴郡閬中

縣又南至墊江縣

何氏曰墊江之墊說文作𦵏从衣不  
从土孟康曰音重疊之𦵏此是後人

傳寫之誤東南入于江

涪水出廣魏涪縣西北

涪水出廣漢屬國剛氐道徼外東南流逕涪縣西王

莽之統睦矣城宮進破涪城斬公孫恢於涪自此水

上縣有潺水出潺山水源有金銀礦洗取火合之以

成金銀潯水歷澇亭而下潯水潯水又東南逕綿竹縣  
北臧宮湖潯至平陽公孫述將王元降遂拔綿竹潯  
水又東南與建始水合水發平洛郡西谿西南流屈  
而東南流入于潯潯水又東南逕江油戍北郤艾自  
陰平景谷步道懸兵束馬入蜀逕江油廣漢者也潯  
水又東南逕南安郡南又南與金堂水會水出廣漢  
新都縣東南流入潯一清按華陽國志曰新  
都有金堂山水通巴溪潯水又  
南枝津出焉西逕廣漢五城縣為五城水又西至成

都入于江

南至小廣魏與梓潼合

小廣魏卽廣漢縣地王莽更名曰廣信也

梓潼水出其縣北界西南入于涪

故廣漢郡也公孫述改為梓潼郡劉備嘉霍峻守葭  
萌之功又分廣漢以北別為梓潼郡以峻為守縣有  
五女蜀王遣五丁迎之至此見大蛇入山穴五丁引  
之山崩壓五丁及五女因氏山為五婦山又曰五婦

墩馳水所出

一清按沔水篇池水即馳水也

一曰五婦水亦曰澆水

也其水導源山中南逕梓潼縣王莽改曰子同矣自

縣西逕涪城東又南入于涪水謂之五婦水口也

一清

按寰宇記射洪縣下引水經注曰涪江水又東南合射江即今射洪縣有此水今本無之

又西南至小廣魏南入于墊江

亦言涪水至此入漢亦謂之為內水也北逕墊江昔

岑彭與臧宮自江州從涪水上公孫述令延岑盛兵

于沈水

一清按車帳後漢書注曰沈水本或作況水及沅水者並非

宮左步右騎

夾船而進勢動山谷大破岑軍斬首溺水者萬餘人  
水為濁流沈水出廣漢縣下入涪水也

涪水出漢中南鄭縣東南旱山北至沔陽縣南入于沔

全氏曰史記沔涪既道鄭康成尚書注曰水自漢出為涪是涪固爾雅之潛也漢志漢中郡安陽縣雋谷水師古曰音潛其字亦或從水而不即以為尚書之潛何哉及讀鄭注有曰安陽之潛尾入漢耳首不自漢出也此言了然乃知潛涪字通而涪水亦不可以當尚貢之潛也

涪水即黃水也東北流逕成固南城北城在山上或  
言韓信始立或言張良創築未知定所制矣義熙九



年索退為果州刺史自成固治此故謂之南城城周  
七里矜澗帶谷絕壁百尋北谷口造城東門傍山尋  
澗五里有餘盤道登陟方得城治城北水舊有桁北  
渡澗水水北有趙軍城城北又有桁渡河取北城城  
即大成固縣治也黃水右岸有悅歸館澗水歷其北  
北至沔陽合沔為三水口也

水經注釋卷三十二

欽定四庫全書

史部

水經注釋卷三十三

三五

詳校官監察御史<sub>臣</sub>周元良

刑部郎中<sub>臣</sub>許兆椿覆勘

總校官降調編修<sub>臣</sub>倉聖脉

校對官編修<sub>臣</sub>周與岱

謄錄監生<sub>臣</sub>郭道藩

欽定四庫全書

水經注釋卷三十三

仁和趙一清撰

江水一

岷山

全氏曰按元和郡縣志汶山即岷山荀子江出汶山是也漢志作岷則增加之文宋祁曰岷當作岷

誤矣說文作

在蜀郡氏道縣

一清按漢志隴西郡氏道縣禹貢養水所出蜀郡湔

氏通禹貢岷山在西徼外江水所出續志同二縣名稱久已各著所出之水又與自蜀漢號湔氏道曰氏道晉既曰才遷於是始相混淆矣水經雖有魏晉間人續增不應江水鉅篇首條遂屬之後來好事者徒以酈注舉

蜀漢之制以釋經不學之徒  
因并經而改之非其義矣

大江所出東南過其縣北

岷山即瀆山也水曰瀆水矣又謂之汶阜山在徼外

江水所導也益州記曰大江泉源即今所聞始發羊

膊嶺下緣崖散漫小水百數殆未濫觴矣東南下百

餘里至白馬嶺而歷天彭闕亦謂之為天彭谷也秦

昭王以李冰為蜀守冰見氏道縣有天彭山兩山相

對其形如闕謂之天彭門亦曰天彭闕江水自此已

上至微弱所謂發源濫觴者也漢元延中岷山崩壅

江水三日不流揚雄反離騷云自岷山投諸江流以

弔屈原名曰反騷也江水自天彭關東逕汶關而歷

氏道縣北漢武帝元封四年分蜀郡北部置汶山郡

以統之

全氏曰按漢武帝元鼎六年以丹驪地置汶山郡地節三年廢屬蜀郡北部非元封四年

縣本秦始皇置後為昇遷縣也益州記曰自白馬嶺

回行二十餘里至龍澗

一清按龍澗亦曰龍鶴華陽國志云蜀時以汶山險要自

汶江龍鶴舟驪白馬匡明皆置戍守即龍澗也周天和元年置龍澗郡元和志云故城在翼州衛山縣北十一里城之北境舊為土谷渾所居故曰防渾城蓋亦氏羌別種之名號也又曰龍鶴通鑑齊紀水明三

年伏池鎮將穆亮帥騎三萬軍于龍鵠是也鵠鶴字  
通又曰龍格晉紀義熙四年桓謙至成都譙縱疑之  
置于龍格胡三省曰即今成  
都府廣都縣龍爪灘之地 又八十里至西陵縣沈氏

曰西陵是  
又南下六十里至石鏡又六十餘里而至  
夔陵之誤

北部始百許步又西百二十餘里至汶山故郡全氏曰晉

移汶山郡治于綿虎  
故以漢治為故郡 乃廣二百餘步又西南百八十

里至溼坂江稍大矣故其精則井絡纏曜江漢晒靈

河圖括地象曰岷山之精上為井絡一清按蜀志秦宓傳裴松之註

引河圖括地象作上為東井絡  
至左思蜀都賦乃省裁東字 帝以會昌神以建福

故書曰岷山導江泉流深遠盛為四瀆之首廣雅曰

江貢也風俗通曰出珍物可貢獻釋名曰江共也小

水流入其中所公共也

一清按漢志蜀郡下云有小江入并行九百八十里

東

北百四十里曰崆山中江所出東注于大江崆山即

崆山也在漢嘉嚴道縣一曰新道山南有九折坂夏

則凝水冬則毒寒王子陽按轡處也平恒言是中江

所出矣郭景純江賦曰流二江於崆崆又東百五十

里曰崆山北江所出東注於大江山海經曰崆山江

水出焉東注大江其中多怪蛇

一清按明楊慎欲據此以當禹貢揚州之

三江真可謂虜人說夢者也

江水又逕汶江道

一清按漢志蜀郡汶江不曰道至續

志始加道字縣有蠻夷謂之道或今本漢書脫道字當以續志水經注補之

汶出徼外岷

山西玉輪坂下而南行又東逕其縣而東注於大江

故蘇代告楚曰蜀地之甲浮船於汶乘夏水而下江

五日而至郢謂是水也又有湔水入焉水出綿道

一清

按班志蜀郡之綿虎續志謂之綿虎道今云綿道似落虎字

亦曰綿虎縣之玉壘

山吕忱云一曰半浣水也下注江

一清按漢志蜀郡綿虎玉壘山前水



所出東南至江陽入江過  
郡三行千八百九十里

江水又東別為沱開明之

所鑿也郭景純所謂玉壘作東別之標者也

一清按漢志蜀

郡沱江縣江沱  
在西南東入江縣即汶山郡治劉備之所置也

全氏曰按

宣帝地節中廢江山郡蜀先主復置之治汶江道晉  
志以為靈帝立劉昭補註郡國志曰安帝延光三年  
復渡江有笮橋縣有桃關漢武帝祠江水又歷都安

縣李冰作大堰於此堰闕江作壩壩有左右口謂之

前壩江入郫江檢江以行舟益州記曰江至都安堰

其右檢其左其正流遂東郫江之右也因山頽水坐

致竹木以溉諸郡又羊摩江灌江西於玉女房下作  
三石人於白沙郵郵在堰官上立水中刻要江神水  
竭不至足盛不沒腰是以蜀人旱則藉以為溉雨則  
不過其流故記曰水旱從人不知饑饉沃野千里世  
號陸海謂之天府也俗謂之都安之堰亦曰湔堰又  
謂金堤左思蜀都賦曰西踰金堤者也諸葛亮北征  
以此堰農本國之所資以征丁千二百人主護之有

今所安營地名觀坂自上觀下反上之象其徵不詳  
不從果為牙門張宏所殺江水又逕臨邛縣王莽之  
監邛也縣有火井鹽水昏夜之時光興上照江水又  
逕江原縣王莽更名邛原也鄴江水出焉江水又東  
北逕郫縣下縣民有姚精者為叛夷所殺掠其二女  
二女見夢其兄當以明日自沈江中喪後日當至可  
伺候之果如所夢得二女之尸於水郡縣表異焉江  
水又東逕成都縣縣以漢武帝元鼎二年立縣有二

江雙流郡下故揚子雲蜀都賦曰兩江珥其前者也

風俗通曰秦昭王使李冰為蜀守開成都兩江溉田

萬頃

一清按漢志郫縣下云禹貢江沱在西東入大江顧祖禹曰世或以成都內江外江為沱水夫

二江為李冰所引非禹貢之沱也宛溪之說誠然且梁荆之沱有三蜀郡之汶江也郫也南郡之枝江也汶江枝江俱無禹貢字而郫獨有之何哉史記河渠書蜀守冰鑿離碓避沫水之害穿二江成都之中注引任豫益州記云二江者郫江流江也常璩華陽國志曰李冰壅江作壩穿郫江檢江別支流雙過郡下檢江即流江水穿一江而為二則水以前無支流可知何得以郫江為沱耶胡拙明則主郫江云推尋事理李冰所穿之二江一是流江乃水所創造一是郫江即禹貢之沱時必淤淺水復從而濬之遂并數為

二江夫既云二江皆水所穿則何以獨指檢江為水之創始而郫江僅加疏濬耶此欲諷附班志郫縣下禹貢二字而不覺言之出于胸臆不可從也江神歲取童女二人為婦水

以女與神為婚徑至神祠勸神酒酒杯恒澹澹水厲聲以責之因忽不見良久有兩牛鬪于江岸傍有閒水還流汗謂官屬曰吾鬪大極當相助也南向腰中正白者我綬也主簿刺殺北面者江神遂死蜀人慕其氣決凡壯健者因名水兒也秦惠王二十七年遣張儀與司馬錯等滅蜀遂置蜀郡焉王莽改之曰導

江也儀築成都以象咸陽晉太康中蜀郡為王國更  
為成都內史益州刺史治地理風俗記曰華陽黑水  
惟梁州漢武帝元朔二年改梁州曰益州以新故隸  
為牂牁越雋州之疆壤益廣故稱益云初治廣漢之  
雒縣後乃徙此故李固與弟圖書曰固今年五十七  
鬢髮已白所為容身而遊滿腹而去周觀天下獨未  
見益州耳昔嚴夫子常言經有五涉其四州有九遊  
其八欲類此子矣初張儀築城取土處去城十里因

以養魚今萬頃池是也城北又有龍隄池城東有千  
秋池西有柳池西北有天井池津流徑通冬夏不竭

西南兩江有七橋直西門邗江冲里橋

一清按華陽國志作冲治

橋此云冲里是唐時寫本避高宗諱  
耳章懷後漢注亦作冲里橋可証也

西南石牛門曰

市橋吳漢入蜀自廣都令輕騎先往焚之橋下謂之

石犀淵李冰昔作石犀五頭以厭水精穿石犀渠於

南江命之曰犀牛里後轉犀牛二頭在府中一頭在

市橋一頭沈之於淵也大城南門曰江橋橋南曰萬

里橋西上曰夷里橋下曰笮橋南岸道東有文學始  
文翁為蜀守立講堂作石室於南城水初後學堂遇

火後守更增二石室後州奪郡學移夷里

一清按講堂一名周

公禮殿

道西故錦官也言錦工織錦則濯之江流而錦

至鮮明濯以佗江則錦色弱矣遂命之為錦里也蜀

有迴瀆水江神嘗溺殺人文翁為守祠之勸酒不盡

拔劍擊之遂不為害江水東逕廣都縣漢武帝元朔

二年置王莽之就都亭也李冰識察水脈穿縣鹽井



江西有望穿原

一清按劉昭補註郡國志引任豫益州記作望川源

鑿山渡水

結諸陂池故盛養生之饒即南江也又從沖里橋北

折曰長昇橋城北十里曰升僊橋有送客觀司馬相

如將入長安題其門曰不乘高車駟馬不過汝下也

後入邛蜀果如志焉李冰沿水造橋上應七宿故世

祖謂吳漢曰安軍宜在七橋連星間

一清按華陽國志曰安軍宜在

七星間全祖望曰自沖里橋至長昇橋為七橋華陽國志曰邛江上西有水平橋城北十里有昇僊橋此二橋不在七星之列今注夫去一句寰宇記云萬里橋亦名雋泉橋橋之南有雋泉也此橋因費禕使吳

諸葛祖嘆得名然則非李冰之舊矣又云笮橋亦名夷里橋而下又有笮橋即夷里橋之日笮橋以竹索為名笮橋以汶江一名笮橋水受氏注故分而為二也又曰江橋亦名安樂橋七星橋之一篇泉橋星橋之二市橋星橋之五而此外無聞焉揚慎四川總志曰考七橋西南石牛門曰市橋下石犀所潛淵中也城南曰江橋南渡流江曰萬里橋西上曰夷里橋曰笮橋曰長笮橋郫江上西有永平橋及城北十里又有昇僊橋不知所謂七橋者竟何所指今存漢自廣者市橋笮橋萬里橋昇僊橋餘俱無所考矣

都乘勝進逼成都與其副劉尚南北相望夾江為營  
浮橋相對公孫述使謝豐揚軍市橋出漢後襲破漢  
墜馬落水緣馬尾得出入壁命將夜潛渡江就向擊

豐斬之於是水之陰江北則左對繁田文翁又穿湔  
洩以溉灌繁田一千七百頃湔水又東絕綿洛逕五

城界至廣都北岸南入於江謂之五城水口斯為北

江

一清按山堂雜論曰外江內江之名前後凡三見  
大江為外水涪水為內水此不易者也湔水入洛

為外江流江入江為內江此自成都府言之也郫江  
對大江而言則大江為南江郫為北江對流江而言  
則流江又為外江郫江為內江此自成都一城言之  
也流江實兼內外之稱各因所指立名似相雜而實  
不相溷也

江水又東至南安為璧玉津故左思云東越玉

津也

又東南過犍為武陽縣青衣水沫水從西南來合而注之

縣故大夜郎國漢武帝開道置以為縣太初四年益

州刺史任安城武陽建元六年置郡王莽更名西順

縣曰賤成光武謂之士大夫郡有鄩江入焉水出江

原縣首受大江東南流至武陽縣注於江

禹貢雖指曰江原縣

鄩水近世謂之大阜江者岷江之正流而班氏以為首受江故鄭康成云沱之類

縣下注上

舊有大橋廣一里半謂之安漢橋水盛歲壞民苦治

功後太守李巖鑿天社山尋江通道此橋遂廢縣有  
赤水下注江建安二十九年有黃龍見此水九日方  
去此縣藉江為大堰開六水門用灌郡下北山昔者  
王喬所升之山也江水又與文井江會李冰所導也

自葭道與蒙谿分水至蜀郡臨邛縣與布僕水合

全氏

曰漢志蜀郡臨邛縣僕千水東至武陽入江過郡  
二行五百一十里而是注云布僕水未知孰是水

出徼外成都西沈黎郡漢武帝元封四年以蜀郡西

部邛葭理旄牛道天漢四年置都尉主外羌

一清按  
范史葭

都夷傳云元鼎六年以為沈黎郡至天漢四年并蜀為西部置兩都尉一居旄牛主徼外夷一居青衣主漢民華陽國志同而前書紀志及續志皆無之亦見青衣水注之

在邛來山表自蜀

西度邛苻其至險有弄棟八渡之難楊母閣路之阻

水從縣西布僕來分為二流一水逕其道又東逕臨

邛縣入文井水文井水又東逕江原縣縣濱文井江

江上有長隄隄跨四十里有朱亭亭南有青城山山

上有嘉穀山下有蹲鴟即芋也所謂下有蹲鴟至老

不飢卓氏之所以樂遠徙也文井江又東至武陽縣

天社山下入江其一水南逕越雋邛都縣西東南至雲南郡之蜻蛉縣入於僕郡本雲川地也蜀建興三年置僕水又南逕永昌郡邪龍縣而與貪水合水出

蜻蛉縣上承蜻蛉水逕葉榆縣又東南至邪龍入於

僕

一清按漢志益州郡葉榆縣貪水首受蜻蛉南至邪龍入僕行五百里

僕水又逕寧

州建寧郡州故庾降都督屯故南人謂之屯下劉禪

建興三年分益州郡置歷雙柏縣即水入焉水出秦

臧縣牛蘭山南流至雙柏縣東注僕水

一清按漢志益州郡秦臧

縣牛蘭山即水所出南至僕水又東至來唯縣入勞

雙柏入僕行八百二十里

水一清按漢志越嶲郡蜻蛉縣僕水徼外東南至來唯入勞過郡二行千八百八十里過郡二謂越嶲

益州也此別是一僕水非臨印之僕千水也亦見溫水注水出徼外東逕其縣與

僕水合東至交州交趾郡麓泠縣南流入於海一清按漢

志益州郡來唯縣勞水出徼外東至糜伶入南海過郡三行三千五百六十里江水自武陽

東至彭亡聚昔岑彭與吳漢源江水入蜀軍次是地

知而惡之會日暮不移遂為刺客所害謂之平模水

亦曰外水此地有彭冢言彭祖冢焉江水又東南逕



南安縣西有熊耳峽連山競險接嶺爭高漢和平中

山崩地震江水逆流

全氏曰續漢書五行志和平元年廣漢梓潼山崩非此山

懸

既有灘名壘坻亦曰鹽漑李冰所平也縣治青衣江

會衿帶二水矣即蜀王開明故治也來敏本蜀論曰

荆人鬻令

一清按寰宇記引周地圖記作鬻靈

死其尸隨水上荆人求

之不得鬻令至汶山下復生起見望帝望帝者杜宇

也從天下女子朱利

全氏曰按華陽國志是朱提女子利

自江源出為

宇妻遂王於蜀號曰望帝望帝立以為相時巫山峽

而蜀水不流帝使鬻令鑿巫峽通水蜀得陸處望帝  
自以德不若遂以國禪號曰開明縣南有峨眉山有  
蒙水即大渡水也水發蒙谿東南流與澁水合水出  
徼外逕汶江道呂忱曰澁水出蜀許慎以為澁水也

從水我聲

一清按漢志蜀郡青衣縣禹貢蒙山谿大渡水東南至南安入澁汶江縣澁水出徼

外南至南安東入江過郡三行三十四里師古曰音哉澁乃澁之誤即禹貢之和夷也和澁入大渡然澁水源長以正之南安入大渡水

禹貢維指曰班固謂大渡入澁道元謂澁

入大渡然澁水源長當以漢志為正大渡水又東入江故山海經曰蒙

水出漢陽西入江灞陽西

全氏曰按此三字不可曉郭注亦無說

又東南過夔道縣北若水淹水合從西來注之又東渚  
水北流注之

縣本夔人居之地理風俗記曰夷中最仁有人道故  
字從人秦紀謂夔僮之富者也其邑高后六年城之  
漢武帝感相如之言使縣令南通夔道費功無成唐  
蒙南入斬之乃鑿石開閣以通南中迄于建寧二千  
餘里山道廣丈餘深三四尺其鑿鑿之迹猶存王莽

更曰夔治也山多猶狃似猴而短足好遊巖樹一騰  
百步或三百丈順往倒返乘空若飛縣有蜀王兵蘭  
其神作大難江中崖峻岨險不可穿鑿李冰乃積薪  
燒之故其處懸巖猶有赤白元黃五色照水焉魚從  
夔來至此而止言畏崖嶼不更上也

一清按寰宇記  
戎州夔道縣有

伏犀灘引水經注云昔有黃牛從夔溪出而  
上此崖乃化為石是名伏犀灘今本無之

益部耆

舊傳曰張貞妻黃氏女也名帛貞乘船覆沒求尸不  
得帛至沒處灘頭仰天而嘆遂自沉淵積十四日帛

持貞手於灘下出時人為說曰符有先絡棘道有張

帛者也江水又與符黑水合水出寧州南廣郡南廣

縣縣故犍為之屬縣也漢武帝太初元年置劉禪延

熙中分以為郡

一清按宋書州郡志朱提太守劉氏分犍為立南廣太守晉武帝分朱提

立又云南廣令晉太康地志屬朱提晉書地理志無南廣郡王遜傳云分朱提為南廣郡武帝疑是成帝之誤方輿紀要云蜀志後主延熙中立南廣郡以常竺為太守晉廢此事不見陳壽書蓋蜀中志乘耳然以是注觀之似是蜀置西晉廢而東晉復立也

導源沔關山北流有大涉水

注之水出南廣縣北流注符黑水又北逕棘道入江

謂之南廣口

一清按漢志犍為郡南廣縣汾闕山符黑水所出北至樊道入江又有大涉水

北至符入江過郡  
三行八百四十里渚水則未聞也

又東過江陽縣南洛水從三危山東過廣魏洛縣南東

南注之

洛水出洛縣漳山亦言出梓潼縣柏山山海經曰三

危在敦煌南與岷山相接山南帶黑水又山海經不

言洛水所導經曰出三危山所未詳常璩云李水道

洛通山水流發暴口逕什邡縣漢高帝六年封雍齒

為侯國王莽更名曰美信也洛水又南逕洛縣故城

南廣漢郡治也漢高帝之為漢王也發巴渝之士北

定三秦六年乃分巴蜀置廣漢郡於乘鄉

一清按下文注云縣

有沈鄉續志云廣漢有沈水即涪水注所謂沈水出廣漢縣下入涪水者也亦作繩鄉華陽國志云廣漢郡本治繩鄉永初一年移治涪後治

維城也蓋乘沈繩字同音假借用耳

王莽之就都縣

曰吾維也漢安帝永初二年移治涪城後治洛縣先是洛縣城南每陰雨常有哭聲聞於府中積數十年

沛國陳寵為守以亂世多死亡暴骸不葬故也乃悉

收葬之哭聲遂絕劉備自將攻洛龐士元中流矢死於此益州舊以蜀郡廣漢犍為為三蜀土地沃美人士雋又一州稱望縣有沈鄉去江七里姜士遊之所居詩至孝母好飲江水嗜魚膾常以雞鳴漚流汲江子坐取水溺死婦恐姑知稱詩遊學冬夏衣服實投

諸江流

一清按後漢書稱廣漢姜詩妻龐其子後因遠汲溺死妻恐姑知哀傷不敢言而托以行

學不在又云永平三年察孝廉拜郎中尋除江陽令卒于官注云子坐取水溺死則死者詩之子何以人云婦恐姑知稱詩遊學於是至孝上通河泉潛出其乎文義實為乖爽矣



舍側而有江之甘焉詩有田濱江澤鹵泉流所溉盡  
為沃野又湧泉之中旦旦常出鯉魚一雙以膳焉可  
謂孝悌發於方寸徽美著於無窮者也洛水又南逕

新都縣蜀有三都謂成都廣都此其一焉與綿水合

水西出綿竹縣又與湔水合

一清按漢志廣漢郡雒  
縣章山雒水所出南至

新都谷  
入湔

亦謂之郫江也又言是涪水呂忱曰一曰湔

然此二水俱與洛會矣又逕犍為牛鞞縣為牛鞞水  
昔羅尚乘牛鞞水東征李雄謂此水也縣以漢武帝

元封二年置

一清按方輿紀要云郫江在成都府城南十里大江之支流也亦曰汶江自灌

縣分流經郫縣歷府西折而南又東合於流江亦謂之內江任豫益州記郫江為內江流江為外江是也晉水寧元年李特據廣漢進攻益州刺史羅尚于成都尚屢敗乃阻長圍緣郫水作營連延七百里戴記尚緣水作營自都安至犍為七百里蓋自郫江南達大江緣水為險也既而特潛渡江擊尚水上軍皆散走蜀郡太守徐儉遂以少城降特入據之或據水經注以綿水為尚所阻之郫江誤矣

又東逕

資中縣又逕漢安縣謂之綿水也自上諸縣咸以灌

溉故語曰綿洛為沒沃也綿水至江陽縣方山下入

江

一清按漢志漢中郡綿竹縣紫岩山綿水所出東至新都北入雒

謂之綿水口亦

曰中水江陽縣枕帶雙流據江洛會也

沈氏曰漢志綿水入洛洛

水入瀟瀟水入江蓋以瀟為主也故曰瀟水東南至江陽入江水經注以洛為主洛水合綿水綿水合瀟江故以江陽為江洛之會前言瀟水自廣都北岸入江特其支流耳漢景帝六年封趙

相蘇嘉為侯國

全氏曰小司馬云縣在東海按地理志東海無江陽也又徐廣曰蘇一作

藉索隱曰漢表作蘇息

江中有大闕小闕焉季秋之月則黃鱗

魚死漚也

朱氏謀埠箋曰黃鱗以下字有譌誤按華陽國志云江中有大闕小闕季春黃龍堆

沒闕即平

昔世祖微時過江陽縣有一子望氣者言江陽

有貴兒象王莽求之而撩煞之後世祖怨為子立祠

於縣謫其民罰布數世揚雄琴清英曰尹吉甫子伯  
奇至孝後母譖之自投江中衣苔帶藻忽夢見水僊  
賜其美藥惟養親揚聲悲歌船人聞之而學之吉甫  
聞船人之聲疑似伯奇援琴作子安之操江水逕漢  
安縣北縣雖迫山川土地特美蠶桑魚鹽家有焉江  
陽郡治也故犍為岐江都尉建安十八年劉璋立江  
水東逕樊石灘又逕大附灘頗歷二險也

又東過符縣北邪

全氏曰按邪字下有脫文孫汝澄曰漢志有邪龍縣竊謂江水不得入蓋

州界而復過符關是不知地理之言也且注東南鯁部但詳符縣之建置以是知經之不及他縣也

### 水從符關東北注之

縣故巴夷之地也漢武帝建元六年以唐蒙為中郎

將從萬人出巴符關者也漢武帝元鼎二年立

全氏曰按

元鼎二年本華陽國志據漢史亦當是建元六年且是立捷為郡今注無郡名而云立何哉

王莽

之符信矣縣治安樂水會水源南通寧州平夷郡營縣北逕安樂縣界之東又逕符縣下北入江縣長趙祉遣吏先尼和以永建元年十一月詣巴郡没死成

濡一清按范史  
常志作濡

灘子賢求喪不得女終年二十五歲

有二子五歲以還至二年二月十五日尚不得喪絡  
乃乘小船至父沒處哀哭自沈見夢告賢曰至二十  
一日與父俱出至日父子果浮出江上郡縣上言為  
之立碑以旌誠孝也其鰥部之水所未聞矣或是水  
之殊目非所究也

又東北至巴郡江州縣東強水涪水漢水白水宕渠水  
五水合南流注之

強水即羌水也宕渠水即潛水渝水矣巴水出晉昌

郡宣漢縣巴嶺山郡隸梁州晉太康中立治漢中清一

按宋志云魏元帝景元四年平蜀復立梁州治漢中  
南鄭晉志云秦始皇三年分益州立梁州于漢中又云  
桓溫平蜀之後以巴漢流人  
立晉昌郡此文似有錯繆縣南去郡八百餘里故

屬巴渠西南流歷巴中逕巴郡故城南李嚴所築大

城北西南入江庾仲雍所謂江州縣對二水口右則

涪內水左則蜀外水即是水也江州縣故巴子之都

也春秋桓公九年巴子使韓服告楚請與鄧好是也

及七國稱王巴亦王焉秦惠王遣張儀等救苴侯於

巴儀貪巴苴之富因執其王以歸而置巴郡焉巴治

江州

一清按此言秦立巴郡故治江州而漢之巴郡亦即治焉故下文復云

漢獻帝初

平元年分巴為三郡於江州則水寧郡治也至建安

六年劉璋納蹇允之訟復為巴郡

全氏曰按善長言三巴建置皆本常

據而不知其誤也華陽國志曰初平元年征東中郎將趙建議白劉璋分巴建欲得巴舊名取墊江以上為巴郡治安漢以江州至臨江為水寧郡以胸忍至魚復為固陵郡而用龐義為巴郡建安六年璋以蹇允訟爭巴名乃改水寧為巴郡以固陵為巴東而改龐義為巴西足為三巴考初平元年劉璋尚未嗣



位趙躔亦未為征東其誤一也躔欲得巴舊名而乃以子胤義其誤二也建安五年義已屯閬中則是固陵太守非巴也其誤三也不知趙躔但分巴為二至蹇允訟後始分為三譙周巴記曰初平六年趙躔分巴為二躔欲得巴舊名故郡以墊江為治而割安漢以下為永寧郡建安六年以蹇允訟分巴為三以永寧為巴東閬中為巴西墊江為巴郡是乃三巴分置之次第也但初平僅四年無六年是則譙氏之誤再考劉璋嗣位以趙躔為征東乃興平元年正分巴之歲也誤以為初平亦酈氏之疎也建安六年趙躔誅故再分巴諸家皆未細覈其歲時耳又曹氏亦嘗分三巴劉璋之末巴郡入于張魯故璋雖有巴郡太守嚴顏屯江州似僅保一城而已魯降曹氏巴郡亦隴之而入建安二十年分其地為三以夷帥朴胡為巴東杜護為巴西任約為巴郡旋以嚴顏為守顏見先主為先主所并故史志不詳

入蜀嘆曰獨坐窮山放虎自衛此即拊心處巴郡漢世治江州巴水北北府城是也後乃徙南城劉備初以江夏費觀為太守領江州都督後都護李嚴更城

周一十六里造蒼龍白虎門求以五郡為巴州治丞

相諸葛亮不許竟不果

全氏曰按嚴欲于城後穿山引汶江入巴以亮不竟不果

此事善長注蓋失記之

地勢側嶮皆重屋累居數有火害又不

相容結舫水居者五百餘家承二江之會夏水增盛壞散顛沒死者無數縣有官橘官荔枝園夏至則熟

二千石常設廚膳命士大夫共會樹下食之縣北有  
稻田出御米也縣下又有清水穴巴人以此水為粉  
則皜曜鮮芳貢粉京師因名粉水故世謂之為江州  
墮林粉粉水亦謂之為粒水矣江之北岸有塗山南  
有夏禹廟塗君祠廟銘存焉常璩庾仲雍並言禹娶  
於此余按羣書咸言禹娶在壽春當塗不於此也

又東至枳縣西延江水從牂柯郡北流西屈注之

江水東逕陽關巴子梁江之兩岸猶有梁處巴之三

闕斯為一也延熙中蜀車騎將軍鄧芝為江州都督  
治此江水又東右逕黃葛峽山高嶮全無人居江水  
入左逕明月峽東至梨鄉歷雞鳴峽江之南岸有枳  
縣治華陽記曰枳縣在巴郡江州東四百里治涪陵  
水會庾仲雍所謂有別江出武陵者也水乃延江之  
枝津分水北注逕涪陵入江故亦云涪陵水也其水  
南導武陵郡昔司馬錯泝舟此水取楚黔中地延熙  
中鄧芝伐徐巨射元後於是縣後自拔矢卷木葉塞

射創芝嘆曰傷物之生吾其死矣江水又東逕涪陵

故郡北後乃并巴郡遂罷省江水又東逕文陽灘

險難上江水又東逕漢平

一清按晉書地理志梁州涪陵郡漢平縣云是蜀置

是注與下二百餘里不相連屬盖有脫失矣

二百餘里左自涪陵東出百

餘里而屆于黃石東為銅柱灘又逕東望峽東歷平

都峽對豐民州舊巴子別都也華陽記曰巴子雖都

江州又治平都即此處也有平都縣為巴郡之隸邑

矣縣有天師治兼建佛寺甚清靈縣有市肆四日一

會江水又逕虎鬚灘灘水廣大夏斷行旅江水又東

逕臨江縣南王莽之監江縣也華陽記曰縣在枳東

四百里東接朐忍縣有鹽官自縣北入鹽井谿有鹽

井營戶沿注谿水江水又東得黃華水口江浦也左

逕石城南庾仲雍曰臨江至石城黃華口一百里又

東至平州州上多居民又東逕壤塗而歷和灘一清按方

輿紀要云自忠州水程東行九十里至曹溪驛又六十

十里至灑塗驛名勝志云灑塗驛在萬縣南六十里

江中有石似胡人名曰胡灘杜少陵詩不是

怕胡灘者是矣灑壤形似和胡音聯故也 又東逕

界壇是地巴東之西界益州之東境故得是名也

又東過魚復縣南夷水出焉

江水又東右得將龜谿口

趙氏彥衛雲麓漫抄曰江水東注凡水經言左者皆

北岸右者皆南岸

華陽記曰胸忍縣出靈龜咸熙元年獻龜

於相府言出自此谿也

全氏曰按漢志胸忍縣容毋水所出即此谿也

江水

又東會南北集渠二谿水出涪陵縣界謂之于陽谿

一清按蜀志後主傳建興八年魏延破魏雍州刺史郭淮于陽谿又魏延傳云使延西入羗中魏後將軍費瑤雍州刺史郭淮與延戰于陽谿延大破淮等據傳文于字為義不屬陽谿豈道元誤哉耶

北流

逕巴東郡之南浦僑縣西谿夾側鹽井二口相去各數十步以木為桶徑五尺修煮不絕谿水北流注於江謂之南集渠口亦曰于陽谿口北水出新浦縣北高梁山分谿南流逕其縣西又南一百里入胸忍縣南入於江謂之北集渠口別名班口又曰分水口胸忍尉治此江水又東右逕沱谿口蓋江沱決入也江水又東逕石龍水至於博陽二村之間有磐石廣四百丈長六里而復

金氏曰先宗伯公云長六里而復者猶言長六里有奇也

殆於岵



塞江川夏沒冬出基互通渚入東逕羊腸虎臂灘楊  
亮為益州至此舟覆懲其波瀾蜀人至今猶名之為  
使君灘江水又東彭水注之水出巴渠羣獠中東南  
流逕漢豐縣東清水注之水導源出西北巴渠縣東  
北巴嶺南獠中即巴渠水也西南流至其縣又西入  
峽檀井谿水出焉又西過山至漢豐縣東而西注彭  
谿謂之清水口彭谿水又逕胸忍縣西六十里南流

注於江謂之彭谿口

一清按漢志巴郡閬中縣彭道將池在南彭道漁池在西南其

即彭水與巴漢志云閬中有彭池大澤寰宇記閬州閬中縣下引四夷述云州東南池東西二里南北約五里州城西南十里有郭池周約五十畝二志與漢志相符彭道將池方輿紀要亦謂之南池在保寧府城南云自漢以來堰大斗小斗之水溉田里人賴之唐時堰壞遂成平陸

江水又東右逕

胸忍縣故城南常璩曰縣有巴東郡西二百九十里

縣治故城跨其山阪南臨大江江之南岸有方山山

形方峭枕側江濱江水又東逕瞿巫灘即下瞿灘也

又謂之博望灘左則湯溪水注之水源出縣北六百

餘里上庸界南流歷其縣翼帶鹽井一百所巴川資

以自給粒大者方寸中央隆起形如張傘故因名之  
曰傘子鹽有不成者形亦必方異於常鹽矣王隱晉  
書地道記曰入湯口四十三里有石煮以為鹽石大  
者如升小者如拳煮之水竭鹽成蓋蜀火井之倫水  
火相得乃佳矣湯谿下與檀谿水合上承巴渠水巴  
渠南歷檀井谿之檀井水下入湯水湯水又南入於  
江名曰湯口江水又逕東陽灘江上有破石故亦通  
謂之破石灘苟延光沒處也常璩曰水道有東陽下

瞿數灘山有大小石城勢靈壽木及橘園也故地理

志曰縣有橘官有民市

全氏曰此三字乃善長所自云非引班志也是篇上下多

記市江水又逕魚復縣之故陵舊郡治故陵谿西二

里故陵村谿即水谷也地多木瓜樹有子大如甌白

黃實甚芬香爾雅之所謂楸也江水又東為落牛灘

逕故陵北江側有六大墳庾仲雍曰楚都丹陽所葬

亦猶枳之巴陵矣故以故陵為名也有魚復尉戍此

江之左岸有巴鄉村村人善釀故俗稱巴鄉清郡出

名酒村側有谿谿中多靈壽木中有魚其頭似羊豐  
肉少骨美於餘魚谿水伏流逕平頭山內通南浦故  
縣陂湖其地平曠有湖澤中有菱芡鯽雁不異外江  
凡此等物皆入峽所無地密惡蠻不可輕至江水又  
東右逕夜清而東歷朝道口有縣治治下有市十日  
一會江水又東左逕新市里南常璩曰巴舊立市於  
江上今新市里是也江水又東右合陽元水口水出  
高陽縣西南高陽山東東北流逕其縣南東北流丙

水注之水發縣東南柏枝山山下有丙穴穴方數丈  
中有嘉魚常以春末遊渚冬初入穴抑亦襲漢丙穴  
之類也其水北流入高陽谿谿水又東北流注於江  
謂之陽元水口江水又東逕南鄉峽東逕永安宮南  
劉備終於此諸葛亮受遺處也其間平地可二十許  
里江山迴濶入峽所無城周十餘里背山面江頽墉  
四毀荆棘成林左右民居多墾其中江水又東逕諸  
葛亮圖壘南石磧平曠望兼川陸有亮所造八陣圖

東跨故壘皆繫細石為之自壘西去聚石八行行間  
相去二丈因曰八陣既成自今行師庶不覆敗皆圖  
兵勢行藏之權自後深識者所不能了今夏水漂蕩  
歲月消損高處可二三尺下處磨滅殆盡江水又東  
逕赤岬城西是公孫述所造因山據勢周迴七里一  
百四十步東高二百丈西北高一千丈南連基白帝  
山甚高大不生樹木其石悉赤土人云如人袒胛故  
謂之赤岬山淮南子曰徬徨於山岬之旁注曰岬山

脅也郭仲產曰斯名將因此而興矣江水又東逕魚復縣故城南故魚國也春秋左傳文公十六年庸與羣蠻叛楚莊王伐之七過皆北唯裨儵魚人逐之是

也地理志江闕都尉治公孫述名之為白帝取其王

巴蜀

一清按是句文義有脫誤元和志云白帝山州城所據初公孫述據蜀殿前井有白龍出自稱

白帝因更魚復城為白帝城龍出殿中事見後漢書述本傳蓋取此端以王巴蜀 章武二年

劉備為吳所破改白帝為永安巴東郡治也漢獻帝

初平元年分巴為三郡

全氏曰初平當作興平三郡當作二郡

以魚復



為故陵郡蹇允訴劉璋改為巴東郡治白帝山城周  
迴二百八十步北緣馬嶺接赤岬山其間平處南北

相去八十五丈東西七十丈又東傍東瀼谿

全氏曰  
按入蜀

記曰土人謂山間之流道江者曰瀼東瀼谿即東屯也公孫述所墾田人有西瀼水見寰宇記與大瀼水而即以為隍西南臨大江闕之眩目唯馬嶺小差透

三  
逸猶斬山為路羊腸數四然後得上益州刺史鮑陋  
鎮此為譙道福所圍城裡無泉乃南開水門鑿石為  
函道上施木天公直下至江中有似猿臂相牽引汲

然後得水水門之西江中有孤石為湮預石冬出水  
二十餘丈夏則沒亦有栽出處矣縣有夷谿即很山  
清江也經所謂夷水出焉江水又東逕廣谿峽斯乃  
三峽之首也其間三十里頽巖倚木厥勢殆交北岸  
山上有神淵淵北有白鹽崖高可千餘丈俯臨神淵  
土人見其高白故因名之天旱燃木崖上推其灰燼  
下穢淵中尋即降雨常璩曰縣有山澤水神旱時鳴  
鼓請雨則必應嘉澤蜀都賦所謂應鳴鼓而興雨也

峽中有瞿塘黃龍二灘夏水迴復沿沂所忌瞿塘灘  
上有神廟尤至靈驗刺史二千石逕過皆不得鳴角  
伐鼓商旅上水恐觸石有聲乃以布裹篙足今則不  
能耳猶饗薦不輟此峽多猿猴不生北岸非惟一處  
或有取之放著北山中初不聞聲將同狢獸渡汶而  
不生矣其峽蓋自昔禹鑿以通江郭景純所謂巴東  
之峽夏后疏鑿者也

又東出江關入南郡界

江水自關東逕弱關扞關扞關廩君浮夷水所置也  
弱關在建平秭歸界昔巴楚數相攻伐藉險置關以  
相防扞秦兼天下置立南郡自巫東上皆其域也

水經注釋卷三十三

欽定四庫全書

水經注釋卷三十四

仁和趙一清撰

江水二

又東過巫縣南鹽水從縣東南流注之

江水又東烏飛水注之水出天門郡瀘中縣界北流  
逕建平郡沙渠縣南又北流逕巫縣南西北歷山道  
三百七十里注於江謂之烏飛口江水又東逕巫縣

故城南縣故楚之巫郡也秦省郡立縣以隸南郡吳  
孫休分為建平郡治巫城城緣山為墉周十二里一  
百一十步東西北三面皆帶傍深谷南臨大江故謂  
之夔國也江水又東巫溪水注之溪水導源梁州晉  
昌郡之宣漢縣東又南逕建平郡秦昌縣南又逕北  
井縣西東轉歷其縣北水南有鹽井井在縣北故縣  
名北井建平一郡之所資也鹽水下通巫溪溪水是  
兼鹽水之稱矣溪水又南屈逕巫縣東縣之東北三

百步有聖泉謂之孔子泉其水飛清石穴潔並高泉  
下注溪水溪水又南入於大江江水又東逕巫峽杜  
宇所鑿以通江水也郭仲產云按地理志巫山在縣  
西南而今縣東有巫山將郡縣居治無恆故也江水  
歷峽東逕新崩灘此山漢和帝永元十三年崩晉太  
元二年又崩當崩之日水逆流百餘里湧起數十丈  
今灘上有石或圓如簞或方似屋若此者甚衆皆崩  
崖所隕致怒湍流故謂之新崩灘其頽巖所餘比之

諸嶺尚為竦築其下十餘里有大巫山非唯三峽所  
無乃當抗峯岷峨偕嶺衡疑其翼附羣山並驟青雲  
更就霄漢辨其優劣耳神益涂所處山海經曰夏后  
啟之臣曰益涂是司神于巴巴人訟于益涂之所其  
衣有血者執之是請生居山上在丹山西郭景純云  
丹山在丹陽屬巴丹山西即巫山者也又帝女居焉  
宋玉所謂天帝之季女名曰瑤姬未行而亡封于巫  
山之陽

一清按李善高唐賦注引襄陽耆舊傳曰精赤帝女姚姬未行而亡葬于巫山之陽



魂為草寔為靈芝所謂巫山之女高唐之岵旦為行  
雲暮為行雨朝朝暮暮陽臺之下旦早視之果如其  
言故為立廟號朝雲焉其間首尾一百六十里謂之  
巫峽蓋因山為名也自三峽七百里中兩岸連山畧  
無闕處重巖疊嶂隱天蔽日自非停午夜分不見曦  
月至於夏水襄陵沿沂阻絕或王命急宣有時朝發  
白帝暮到江陵其間千二百里雖乘奔御風不似疾  
也春冬之時則素湍淪潭迴清倒影絕巘多生檉栢

一清按御覽引此文作怪栢

懸泉瀑布飛漱其間清榮峻茂良多

趣詣每至晴初霜旦林寒澗肅常有高猿長嘯屬引

淒異空谷傳響哀轉久絕故漁者歌曰巴東三峽巫

峽長猿鳴

一清按寰宇記作清猿

三聲淚沾裳江水又東逕石

門灘灘北岸有山山上合下開洞達東西緣江步路

所由劉備為陸遜所破走逕此門追者甚急備乃燒

鎧斷道孫桓為遜前驅奮不顧命斬上夔道截其要

徑備踰上越險僅乃得免忿恚而歎曰吾昔至京桓

尚小兒而今迫孤乃至于此遂發憤而薨矣

又東過秭歸縣之南

縣故歸鄉地理志曰歸子國也樂緯曰昔歸典叶聲  
律宋忠曰歸即夔歸鄉蓋夔鄉矣古楚之嫡嗣有熊  
摯者以廢疾不立而居于夔為楚附庸後王命為夔  
子春秋僖公二十六年楚以其不祀滅之者也袁山  
松曰屈原有賢姊聞原放逐亦來歸喻令自寬全鄉  
人冀其見從因名曰姊歸即離騷所謂女嬃嬋媛以

晉余也縣城東北依山即坂周迴二里高一丈五尺  
南臨大江古老相傳謂之劉備城蓋備征吳所築也  
縣東北數十里有屈原舊田宅雖畦堰瀾漫猶保屈  
田之稱也縣北一百六十里有屈原故宅累石為屋  
基名其地曰樂平里宅之東北六十里有女嬃廟擣  
衣石猶存故宜都記曰秭歸蓋楚子熊繹之始國  
曰按既曰熊繹之始國則非熊氏  
摯附庸所居矣自相參辰何也而屈原之鄉里也原  
田宅于今其存指謂此也江水又東逕其城北城憑

嶺作固二百一十步夾谿臨谷據山枕江北對丹陽  
城城據山跨阜周八里二百八十步東北兩面悉臨  
絕澗西帶亭下溪南枕大江嶮峭壁立信天固也楚  
子熊繹始封丹陽之所都也地理志以為吳之丹陽  
論者云尋吳楚悠隔縷荆山無容遠在吳境是為  
非也一清按班志此文在丹陽郡丹陽縣下然觀子  
草僻處荆山之語則枝江為近鄭氏故辭而闕  
之  
又楚子先王陵墓在其間蓋為徵矣江水又東南  
逕夔城南城跨據川阜周迴一里百一十八步西北

背枕深谷東帶鄉口溪南側大江城內西北角有金

城東北角有員土獄西南角有石井口徑五尺熊摯

始治巫城後疾移此蓋夔徙也

全氏曰熊摯不得為熊繹後故封夔非自

徙春秋左傳僖公二十六年楚令尹子玉滅夔者也

服虔曰在巫之陽梯歸歸鄉矣江水又東逕歸鄉縣

故城北袁山松曰父老傳言原既流故忽然暫歸鄉

人喜悅因名曰歸鄉抑其山秀水清故出雋異地嶮

流疾故其性亦隘詩云惟岳降神生甫及申信與余

謂袁山松此言可謂因事而立證恐非名縣之本旨  
矣縣城南面重嶺北背大江東帶鄉口溪溪源出縣  
東南數百里西北入縣逕狗峽西峽崖龕中石隱起  
有狗形形狀具足故以狗名峽鄉口溪又西北逕縣  
下入江謂之鄉口也江水又東逕信陵縣南臨大江  
東傍深溪溪源北發梁州上庸縣界南流逕縣下而  
注於大江也

又東過夷陵縣南

江水自建平至東界峽盛宏之謂之空冷峽峽甚高峻即宜都建平二郡界也其間遠望勢交嶺表有五六峯參差五出上有奇石如二人像攘袂相對俗傳兩郡督郵爭界於此宜都督郵厥勢小東傾議者以為不如也江水歷峽東逕宜昌縣之挿竈下江之左岸絕岸壁立數百丈飛鳥所不能棲有一火燼插在崖間望見可長數丈父老傳言昔洪水之時人薄舟崖側以餘燼插之巖側至今猶存故先後相承謂之



挿竈也江水又東逕流頭灘其水並峻激奔瀑魚鼈  
所不能游行者常苦之其歌曰灘頭白勃堅相持條  
忽淪沒別無期袁山松曰自蜀至此五千餘里下水  
五日上水百日也江水又東逕宜昌縣北分夷道很  
山所立也縣治江之南岸北枕大江與夷陵對界宜  
都記曰渡流頭灘十里便得宜昌縣也江水又東逕  
狼尾灘而歷人灘袁山松曰二灘相去二里人灘水  
至峻峭南岸有青石夏沒冬出其石嶽崱數十步中

悉作人面形或大或小其分明者鬚髮皆具因名曰  
人灘也江水又東逕黃牛山下有灘名曰黃牛灘南  
岸重嶺疊起最外高崖間有石色如人負刃牽牛人  
黑牛黃成就分明既人跡所絕莫得究焉此巖既高  
加以江湍紆迴雖途經信宿猶望見此物故行者謠  
曰朝發黃牛暮宿黃牛三朝三暮黃牛如故言水路  
紆深迴望如一矣江水又東逕西陵峽宜都記曰自  
黃牛灘東入西陵界至峽口一百許里山水紆曲而

兩岸高山重嶂非日中夜半不見日月絕壁或千許丈其石綵色形容多所像類林木高茂畧盡冬春猿鳴至清山谷傳響泠泠不絕所謂三峽此其一也山松言常聞峽中水疾書記及口傳悉以臨懼相戒曾無稱有山水之美也及余來踐齋此境既至欣然始信耳聞之不如親見矣其疊嶂秀峯竒構異形固難以辭叙林木蕭森離離蔚蔚乃在霞氣之表仰矚俯映彌習彌佳流連信宿不覺忘返目所履歷未嘗有

也既自欣得此奇觀山水有靈亦當驚知已於千古  
矣江水歷禹斷江南峽北有七谷村兩山間有水清  
深潭而不流又耆舊傳言昔是大江及禹治水此江  
水不足瀉水禹更開今峽口水勢并衝此江遂絕於  
今謂之斷江水也江水峽東南流逕故城州州附北  
岸州頭曰郭州長二里廣一里上有步闌故城方圓  
稱州周迴畧滿故城州上城周一里吳西陵督步騭  
所築也孫皓鳳皇元年隳息闌復為西陵督據此城

降晉晉遣太傅羊祜接援未至為陸抗所陷也江水  
又東逕故城北所謂陸抗城也城即山為壙四面天  
險江南岸有山孤秀從江中仰望壁立峻絕袁山松  
為郡嘗登之矚望焉故其記云今自山南上至其嶺  
嶺容十許人四面望諸山畧盡其勢俯臨大江如縈  
帶焉視舟如鳧雁矣北對夷陵縣之故城城南臨大  
江秦令白起伐楚三戰而燒夷陵者也應劭曰夷山  
在西北蓋因山以名縣也王莽改曰居利吳黃武元

年更名西陵也後復曰夷陵縣北三十里有石穴名  
曰馬穿嘗有白馬出穴食人遂之入穴潛行出漢中  
漢中人失馬亦嘗出此穴相去數千里袁山松言江  
北多連山登之望江南諸山數十里莫識其名高  
者千仞多奇形異勢自非煙寨雨霽不辨見此遠山  
矣余嘗往返十許過正可再見遠峯耳江水又東逕  
白鹿巖沿江有峻壁百餘丈猿所不能遊有一白鹿  
陵峭登崖乘巖而上故世名此巖為白鹿云江水又

東歷荆門虎牙之間荆門在南上合下開閣徹山南  
有門像虎牙在此石壁色紅間有白文類牙形並以  
物像受名此二山楚之西塞也水勢急峻故郭景純  
江賦曰虎牙桀豎以屹峩荆門鬪竦而盤薄圓淵九  
迴以懸騰湓流雷响而電激者也漢建武十一年公  
孫述遣其大司徒任滿翼江王田戎將兵萬據嶮為  
浮橋橫江以絕水路營壘跨山以塞陸道光武遣吳  
漢岑彭將六萬人擊荆門漢等率舟師攻之直衝浮

橋因風縱火遂斬滿等矣

又東南過夷道縣北夷水從很山縣南東北注之

夷道縣漢武帝伐西南夷路由北出故曰夷道矣王

莽更名江南桓溫父名彝改曰西道魏武臨江分南

郡置臨江郡劉備改曰宜都郡治在縣東四百步故

城吳丞相陸遜所築也為二江之會也

全氏曰按夷水別名清江

其入江也有涇渭之分故曰二江之會

北有湖里淵淵上橘柚蔽野桑

麻閣日西望很山諸嶺重峯疊秀青翠相臨時有丹



霞白雲遊曳其上城東北有望堂地特峻下臨青江  
遊矚之名處也縣北有女觀山厥處高顯回眺極目  
古老傳言昔有思婦夫官於蜀屢愆秋期登此山絕  
望憂感而死山木枯悴鞠為童枯鄉人哀之因名此  
山為女觀焉葬之山頂今孤墳尚存矣

又東過枝江縣南沮水從北來注之

江水又東逕上明城北晉太元中苻堅之寇荊州也  
刺史桓沖徙渡江南使劉波築之移州治城也其地

夷敞北據大江江沱枝分東入大江縣治州上故以  
枝江為稱地理志曰江沱出西南東入江是也其民  
古羅徙羅故居宜城西山楚丈王人徙之於長沙今  
羅縣是矣縣西三里有津鄉津鄉里名也春秋莊公  
十九年巴人伐楚楚子禦之大敗於津應劭曰南郡  
江陵有津鄉今則無聞矣郭仲產云尋楚禦巴人枝  
江是其塗便此津鄉殆即其地也盛宏之曰縣舊治  
沮中後移出百里州西去郡一百六十里縣左右有

數十州槃布江中其百里州最為大也中有桑田甘  
果映江依州自縣西至上明東及江津其中有九十  
九州楚諺云州不百故不出王者桓元有問鼎之志  
乃增一州以充百數僭號數旬宗滅身屠及其傾敗  
州亦消毀今上在西忽有一州自生沙流迴薄成不  
淹時其後未幾龍飛江漢矣日知錄曰凡引用前人  
之言必用前文水經注  
引盛宏之荊州記所指今上則南宋文帝  
以宜都王即帝位之事古人不以為嫌 縣東二里  
有縣人劉凝之故宅凝之字志安兄盛公高尚不仕

凝之慕老萊嚴子陵之為人立屋江湖非力不食妻  
梁州刺史郭詮女亦能安貧宋元嘉中夫妻隱於衡  
山終焉不返矣縣東北十里土臺北岸有逸州長十  
餘里義熙初烈武王斬桓謙處縣東南二十里富城  
州上有道士范儕精廬自言巴東人少遊荆土而多  
盤桓縣界惡衣簷食蕭散自得言來事多驗而辭不  
可詳人心欲見歛然而對貌言尋求終弗遇也雖逕  
跨諸州而舟人未嘗見其濟涉也後東遊廣陵卒于

彼土儕在州無定止處宿憇一小菴而已弟子慕之  
於其昔遊共立精舍以存其人縣有陳留王子香廟  
頌子香於漢和帝之時出為荊州刺史有惠政天子  
徵之道卒枝江亭中常有三白虎出入人間送喪踰  
境百姓追美甘棠以永元十八年立廟設祠刻石銘  
德號曰枝江白虎王君其子孫至今猶謂之為白虎  
王江水又東會沮口楚昭所謂江漢沮漳楚之望也  
又南過江陵縣南

縣北有州號曰枝迴州

金氏曰或云枝江所迴繞故亦曰枝迴

江水自

此兩分而為南北江也

禹貢錐指曰袁中道澧遊記曰鄴道元注水經于江陵枝

迴州下有南北江之名南江即江水由澧入洞庭者也陵谷變遷今之大江始獨專其澎湃而南江之跡稍稍湮滅僅為衣帶細流然江水會澧故道猶可考云小修此義最為精覈水經注澧水自石門以西與導江無涉其南江會澧故道參以近志東入洞庭此道江東至于澧過九江至于東陵之故道也一清按水經及注則是澧水注江非江會澧所云畧有差錯

北江有故鄉州元興之末

桓元西奔毛祐之與參軍費恬射元於此州元子昇年六歲輒拔去之王韶之云元之初奔也經日不得

食左右進麤粥咽不下昇抱元胸撫之元悲不自勝  
至此益州都護馮遷斬元於此州斬昇於江陵矣下  
有龍州州東有寵州二州之間世擅多魚矣漁者投  
罟歷網往往維絕有潛客泳而視之見水下有兩石  
牛嘗為罾害矣故漁者莫不擊浪浮舟鼓柁而去矣  
其下謂之邠里州州有高沙湖湖東北有小水通江  
名曰曾口江水又東逕鷺尾州北合靈溪水水無泉  
源上承散水合成大溪南流注江江溪之會有靈溪

戍背阿面江西帶靈溪故戍得其名矣江水東得馬  
牧口江水斷州通會江水又東逕江陵縣故城南禹  
貢荆及衡陽惟荆州盖即荆山之稱而制州名矣故  
楚也子革曰我先君僻處荆山以供王事遂遷紀郢  
今城楚船官地也春秋之渚宮矣秦昭襄王二十九  
年使白起拔鄢郢以漢南地而置南郡焉周書曰南  
國名也南氏有二臣力鈞勢敵競進爭權君弗能制  
南氏用分為二南國也按韓嬰叙詩云其地在南郡



南陽之間呂氏春秋所謂禹自塗山巡省南土者也  
是郡取名焉後漢景帝以為臨江王榮國王坐侵廟  
垣地為宮被徵升車出北門而軸折父老竊流涕曰  
吾王不還矣自後北門不開蓋由榮非理終也漢景

帝二年改為江陵縣

全氏曰秦置南郡即治江陵高  
帝元年改郡名曰臨江以封共

敖而本表曰都江臨高帝五年復曰南郡景帝二年  
又曰臨江郡以邦子榮中二年復為南郡蓋郡名有  
更易縣名無  
改移注非是王莽更名南順縣曰江陸舊城關公所

築公北園曹仁呂蒙襲而據之公曰此城吾所築不

可攻也乃引而退杜元凱之攻江陵也城上人以鐵  
繫狗頸示之元凱病瘵故也及城陷殺城中老小血  
流沾足論者以此薄之江陵城地東南傾故緣以金  
隄自靈溪始桓溫令陳遵造遵善於方功使人打鼓  
遠聽之知地勢高下依傍創築畧無差矣城西有柶  
霞樓俯臨通隍吐納江流城南有馮牧城西倒馮徑  
此州始自牧迴下迄於此長七十餘里州上有奉城  
故江津長所治舊主度州郡貢於洛陽因謂之奉城

亦曰江津戍也戍南對馬頭岸昔陸抗屯此與羊祜  
相對大宏信義談者以為華元子反復見於今矣北  
對大岸謂之江津口故州亦取名焉江大自此始也  
家語曰江水至江津非方舟避風不可涉也故郭景  
純曰濟江津以起漲言其深廣也江水又東逕郢城  
南子囊遺言所築城也地理志曰楚別邑故郢矣王  
莽以為郢亭城中有趙臺卿冢岐平生自所營也冢  
圖賓主之容用存情好叙其宿尚矣江水又東得豫

章口夏水所通也西北有豫章岡蓋因岡而得名矣  
或言因楚王豫章臺名所未詳也

水經注釋卷三十四